

14 September. 2025. 18:15 Hrs

Headlines

- प्रधानमंत्री नरेंद्र मोदी होरें आखेआ जे भारत दुनिया च सब्बने शा तेजिया कन्नै विकास करने आह्ला देश ऐ ते विकसित भारत दे लक्ष्य गी पूरा करने लेइ, सब्ब किट्टे रलियै जत्त करा'रदे न।
- समूलचे देसै च अज्ज हिंदी दिवस मनारया जा'रदा ऐ। अज्जे दे दिन हिंदी गी मुल्खै दी आधिकारिक भाशा दे रूपै च अपनाया गेआ हा, प्रधानमंत्री होरें हिंदी भाशा गी देसै दी पंछान ते मुल्लें-कदरें दी विरासत करार दित्ता ऐ।
- उपमुख्यमंत्री सुरिंद्र चौधरी होरें नौशहरा च पंजीकृत मजदूरें गी 12 लख 76 ज्हार रपें दी माली मदाद उपलब्ध करोआई ऐ।
- इक हफ्ते दी बंदिश दे मगरा डोडा जिले च अज्ज ब्राडबैंड इंटरनेट सेवां परतियै ब्हाल करी दित्तियां गेइयां न।
- ते क्रिकेट च मर्दे दे टी-20 एशिया कप टूर्नामेंट दे ग्रुप-ए दे मकाबले च अज्ज भारत ते पाकिस्तान आमने-सामने होइना।

<><><><><><>

PM-Assam

प्रधानमंत्री नरेंद्र मोदी होरें आखेआ ऐ जे भारत दुनिया च सब्बने शा तेजिया कन्नै विकास करने आह्ला देश ऐ ते असम देसा दे सब्बने शा तेजिया कन्नै विकास करा'रदे राज्यें चा इक्क बनी गेआ ऐ। श्री मोदी होरें गलाया जे देश विकसित भारत दे निर्माण ताई इक्कजुट होइये अगगे बदा'रदा ऐ ते इस धेइये गी हासल करने च पूर्वोत्तर दी बड़ी बड़ी भूमिका ऐ। प्रधानमंत्री होरें आखेआ जे घुसपैठियें रायं सरहदी इलाकें दी जनसांख्यिकी बदलने दियां

साजिशां चला'रदियां न। उनें गलाया जे एहू राश्ट्री सुरक्षा ताई बड़ा बड़ा खतरा ऐ। श्री मोदी होरें आखेआ जे इस करियै हुन देसै च जनसांख्यिकी मिशन रम्भ कीता जा करदा ऐ। प्रधानमंत्री नरेंद्र मोदी होरें दरांग जिले च लोकें दे किट्टु गी संबोधित करदे होई एहू गल्ल आखी। एहूदे शा पैहले उनें असम च 18,530 करोड़ रपे शा बद्द दियां बुनियादी ढांचागत ते औद्योगिक विकास परियोजना दा उद्घाटन कीता ते नीहू पत्थर रखेआ।

<><><><><><>

Hindi-Diwas

अज्ज समूलचे देसै च हिंदी दिवस मनाया जा करदा ऐ। 1949 च अज्जै दे ध्याड़े संविधान सभा नै देवनागरी लिपि च लिखे जाने आहली हिंदी गी देसै दी आधिकारिक भाषा दे तौरा पर अपनाया हा। प्रधानमंत्री नरेंद्र मोदी होरें अज्ज हिंदी दिवस दे मौके पर देशवासियें गी शुभकामनां दित्तियां न। इक्क सोशल मीडिया पोस्ट च श्री मोदी होरें आखेआ जे हिंदी शड़ा संचार संपर्क दा जरिया नेई ऐ, सगुआं देसै दी पंछान ते मुल्लें-कट्रें दी शानदार विरासत ऐ। केंद्री गृहमंत्री अमित शाह होरें बी अज्ज हिंदी दिवस दे मौके पर शुभकामना दित्तियां न। श्री शाह होरें आखेआ।

.....

उपराज्यपाल मनोज सिन्हा होरें बी हिंदी दिवस दे मौके पर दिली मबारकबाद दित्ती ऐ।

<><><><><><>

Dy. CM Nowshera

उपमुख्यमंत्री सुरेंद्र चौधरी होरें नोशेरा च पंजीकृत मजदूरें गी 12 लक्ख 76 जहार रपें दी माली मदाद उपलब्ध कराई ऐ। एहू माली मदाद मजदूरें गी कुदरती जा हादसे दुरान होई दी मौत, स्थाई तौरा पर दिव्यांग, शादी-ब्याह लेई आर्थिक तौरा पर सहायता बच्चे दी पढाई-लिखाई, ते 10मीं जा 12मीं जमात दे विद्यार्थियें दे वजीफे लेई दित्ती गेई ऐ। इस मौके पर अपनी खुशी जाहिर करदे होई उपमुख्यमंत्री होरें आखेआ जे लोकें गी कीते गेदे वायदें गी पूरा करने दी शुरूआत होई गेई ऐ। उनें आखेआ।

<><><><><><>

Women Health Campaign

आयुष मंत्रालय, महिलाएं दी सेहत ते कल्याण गी बढ़ावा देने ताई "स्वस्थ नारी सशक्त परोआर" कल्याण मंत्रालय दा एहू राश्ट्री अभियान ऐ। 16एं दिनें तगर चलने आह्ला एहू अभियान महिलाएं दी सेहत ते बक्ख-बक्ख बमारियें दी जांच पर केंद्रित ऐ। एहू अभियान राज्य ते केंद्र शासित प्रदेशें दे प्रशासन दे कन्नो-कन्नी आयुष अनुसंधान संस्थानें, शैक्षणिक इदारे, उद्योगें ते गैर सरकारी संगठनें सने होर दुए मुतल्लका मैहकमें, संगठनें ते संघें दे सहयोग कन्नै चलाया जा करदा ऐ।

<><><><><><>

Programme Announcement

सेवा सप्ताह 2025 दे तैहत आयोजित बक्ख-बक्ख कार्यक्रमें ते गतिविधियें दे इक हिस्से दे तौरा पर आकाशवाणी दा क्षेत्रीय समाचार एकांश जम्मू, कल 15 सितम्बर गी दिनें 12 बजे 25एं मिनटें दी इक वशेष परिचर्चा प्रसारत करने जा'रदा ऐ-जेहदा विषय सार ऐ- "मिट्टी थमां स्मृद्धि तगर दा सफर, राई-बाई ते करसानें दा सशक्तिकरण"। इस कार्यक्रम च स्टाडे परौहने होगन- स्कॉस्ट जम्मू दे सॉयल साइंस डिविजन दे हेड प्रो. विकास शर्मा होर- जेहडे इस विषय दे बक्ख-बक्ख पैहलुएं पर लौ पागन। उन्दे कन्नै गल्लबात करगन अभिलाषा शर्मा ते विजय बजाज। 25एं मिन्टे दा एहू कार्यक्रम कल 15 सितंबर गी दिने 12 बजे प्रसारत कीता जाहग, जिसी तुस स्टाडी FM फ्रिक्वेंसी 100 इशारिया 3 मैगाहर्ट्स ते कन्नै मीडियम वेव 303 मीटर यानि 990 Khz पर बी सुनी सकदे ओ।

<><><><><><>

GST-Reforms

जम्मू-कश्मीर दे बसनीकें जीएसटी दे सुधारे तैहत हाल च गै जीएसटी दरे च कीती गेदी कटौती दा सोआगत कीता ऐ ते इसी आम आदमी ताई इक बड्डी राहत दस्सेआ। सरकार नै सेहत ते जीवन बीमा प्रीमियम गी पूरी चाल्ली टैक्स मुक्त करी दित्ता ऐ जेदा मकसद बीमा कवरेज गी बढ़ावा देना ऐ। 36 जान बचाने आहिलियें कैंसर ते परानी बमारी दी दोआइयें उप्पर बी टैक्स माफ करी दित्ता गेआ ऐ। पट्टियां, ग्लूकोमीटर ते थर्मामीटर जनेय

लोडचदे मेडिकल समेयान पर जीएसटी 12 प्रतिशत थमां घटाइये 5 प्रतिशत करी दित्ता ऐ। मकामी लोकें इस गैऽ दी सराहना कीती ऐ।

<><><><><><>

ते हुन बाकि दिएं खबरें कन्नै अभिलाषा शर्मा।

Yatra-Suspended

श्री माता वैष्णो देवी जी दी जात्तरा जेड़ी अज्ज बहाल होने आहली ही, रियासी जिले च लगातार बरा करदी बरखा करियै अगले हुकम जगर परतियै स्थगित करी दित्ती गेई ऐ। श्री माता वैष्णो देवी श्राइन बोर्ड नै कल सोशल मीडिया पोस्ट च इस सरबंध्यै च ऐलान कीता। पिछले म्हीने दी 26 तरीक थमां मौहलेधार बरखा करियै यात्रा आहले रस्ते पर पेई दियें ल्हास-पस्सियें कोला किश घंटे पैहले यात्रा आरजी तौरा पर रोक़ी दित्ती गेई ही। बोर्ड नै इक्क बयानै च लोकें अगगे अपील कीती ऐ जे ओहू यात्रा पर औने कोला पैहले संचार माध्यमें रायं हालात दी ताजा जानकारी लैंदे रौहना। इस बारै गल्लबात करदे होई यात्रुएं आखेआ।

.....बाईट.....

इस्सै सिलसिले च यात्रा दी शुरूआत आस्तै बलगा'रदे श्रद्धालुएं लेई श्री माता वैष्णो देवी श्राइन बोर्ड नै कटड़ा च दाखल होने आहली थाहरें पर प्रसाद बंडना शुरू कीता ऐ।

<><><><><><>

Doda-Broadband Restored

प्रशासन नै अज्ज डोडा जिले च ब्रॉडबैंड इंटरनेट सेवां बहाल करी दित्तियां न। ध्यानजोग ऐ जे इत्थे आम आदमी पार्टी आप दे मौजूदा विधायक मेहराज मलिक गी जन सुरक्षा अधिनियम-पीएसए तैहत हिरासत च लैते जाने मगरा तकरीबन इक्क हफ्ते तक्कर लग्गी दियें बंदिशें परैंत हालात सामान्य होआ करदे न। डोडा-किश्तवाड़-रामबन रेंज दे डी.आई.जी श्रीधर पाटिल, डोडा दे डी.सी हरविंद्र सिंह ते एसएसपी संदीप कुमार मैहता होरें समाज दे मिम्बरें कन्नै बैठक लाई, जेदे मगरा शनिवार दपैहरी थमां लोकें दी आओजाई पर लग्गी दियें बंदशें च 6 घंटें दी

ढिल्ल दिक्ती गेई। अफसरें दस्सेआ जे दकानें-हट्टियें गी पूरी चाल्ली खोलने, गड्डियें दी आओजाई गी रम्भ करना, मोबाइल इंटरनेट सेवा दी बहाली ते स्कूलें गी परतिय खोलना जमीनी सतह पर समीक्षा करने बाद चरणबद्ध ढंगे नै इस सरबंघे च फैसला लैता जाग।

<><><><><><>

Poonch-Residents

आपरेशन सिंदूर दरान पाकिस्तान पासेआ सरहद पार थमां कीती गेदी गोलाबारी कन्नै प्रभावित पुंछ दे बसनीकें घर बनाने दे सरकार दे हालिया फैसले पर संदोख प्रगट करदे होई धन्नवाद कीता ऐ। जम्मू-कश्मीर प्रशासन आसेआ रम्भ कीती गेदी इस पहल दा मकसद उनें लोकें गी आसरमे ते मदाद उपलब्ध करोआना ऐ जिंदे घर गी संघर्ष दरान बुरी चाल्ली नुकसान पुज्जे दा ऐ। मकामी बसनीक अभिनव शर्मा जिंदे घर गी पाकिस्तानी गोलाबारी च सब्बने शा मता नुकसान होआ हा, उनें इस दर्दनाक ध्याड़े गी चेता करदे होई गलाया जे सरहद पार थमां दागे गेदे त्रै गोले सिद्दे उन्दे घर पर लग्गे ते घर पूरी चाल्ली तबाह होई गेआ। उनें अग्गे आखेआ।

<><><><><><>

Asia-Cup Cricket

मर्दे दे टी-20 एशिया कप च अज्ज दुबई च ग्रुप-ए दे मैच च भारत दा मकाबला पाकिस्तान कन्नै होगा। मैच रातीं 8 बजे थमां खेडेया जाग। इस बःरै फरवरी म्हीने बाद दौनें टीमां पहली बारी आमने-सामने होङ्गन। दौनें टीमा यू.ए.ई ते ओमान खलाफ शानदार जित्त दर्ज करने परेंत इस मकाबले च उत्तरा करदियां न। भारत नै बुधवार गी यू.ए.ई गी 9 विकटें कन्नै हराया जिल्ल के पाकिस्तान नै शुक्रवार गी ओमान पर 93 रण्जें कन्नै जित्त हासल कीती। तोआई, कल राती श्रीलंका नै बांगलादेश गी 6एं विकटें कन्नै हराई दिक्ता।

<><><><><><>

Highway

जम्मू-कश्मीर राष्ट्रीय जलनैली शिडक एन.एच-44 पर गड्डिये दी आओजाई पर असर पेदा ऐ कीजे उधमपुर कश थरड थाह सडक अजे पूरी चाल्ली बहाल नेई होई सकी ऐ। शिडके गी पुजे दे बडे मते नुकसान ते लगातार बरा करदी बरखा करियै गड्डिये दा आना-जाना बंद ऐ। कल श्रीनगर थमां औने आहिलिये भारी गड्डिये गी लम्मे जाम दा सामना करना पेआ ते शिडक दी खराब हालत करियै उ'नेंगी जेसीबी ते लोडरे दी मदाद लैनी पेई। काजीगुंड च फले कनै लदोए दे ट्रके दे फसे होने करियै एन.एच-44 पर दबिक्खया हल्की मोटर गड्डिये गी चलने दी खुल्ल नेई दिती गेई ऐ। डोडा, किशतवाड़ ते रामवन थमां जम्मू बक्खी जाने आहिलिये गड्डिये गी बी इजाजत नेई दिती गेई ऐ। उआं मुगल रोड हल्की मोटर गड्डिये लेई खुल्ला ऐ।

<><><><><><>

Man Killed

राजौरी जिले दे थन्नामंडी च डेरा दी गली इलाके कश अज्ज पेश आए दे इक शिडक हादसे च 45 ब'रे दी बरेसू दे इक्क जने दी मौत होई गेई। अधिकारिये दस्सेआ जे डेरा की गली रोड कश इक्क गड्डी डरैवर दे काबू शा बाहर होइये पलटोई गेई। हादसे च डरैवर दी मौके पर गै मौत होई गेई, जेदी पंछान मोहम्मद यूनिस पुत्र मकबूल हुसैन निवासी थन्नामंडी दे बसनीक दे तौर पर कीती गेई ऐ। इस सरबंथे च मामला दर्ज करियै कार्रवाई रम्भ करी दिती गेई ऐ।

<><><><><><>